

Prof. dr. Ibrahim Karabegović (1931-2011)



U Sarajevu je 27. augusta 2011. godine preminuo Ibrahim Karabegović, povjesničar koji zauzima značajno mjesto u bosanskohercegovačkoj historiografiji. Profesor Karabegović je svojim angažmanom dao doprinos radu Instituta za istoriju, te Odsjeka za historiju na Filozofskom fakultetu u Sarajevu.

Rođen je 5. juna 1931. godine u Modriči. Tu je stekao osnovno obrazovanje. Pohađao je gimnazije u Banja Luci, Derventi i Doboju, gdje je i maturirao. Studij historije je završio 1956. godine na Filozofskom fakultetu u Sarajevu. Vratio se u rodni kraj gdje je radio kao profesor historije u osnovnoj školi i gimnaziji. Na mjesto asistenta na Institutu za istoriju radničkog pokreta (danas Institut za istoriju) primljen je 1963. godine. Nedugo nakon toga je upisao postdiplomski studij na Filozofskom fakultetu u Beogradu, gdje je 1966. odbranio magistarski rad pod naslovom *Rascjep u radničkom pokretu BiH 1919-1920. godine*. Doktorsku tezu *Reformizam u radničkom pokretu u Bosni i Hercegovini između dva svjetska rata (1919-1941)* odbranio je 1976. godine na Filozofskom fakultetu u Sarajevu. Stekao je zvanje naučnog savjetnika 1985. godine.

Profesor Karabegović je bio angažiran i kao direktor Instituta za istoriju u dva navrata. Na Filozofskom fakultetu u Sarajevu je izabran u zvanje redovnog profesora 1994. godine gdje je držao nastavu iz predmeta Istorija Jugoslavije. Bio je i glavni i odgovorni urednik časopisa *Prilozi*.

U svom naučnom radu je stavljao fokus na socijalnu historiju i historiju reformističkog radničkog pokreta. Iza sebe je ostavio dvije autorske i šest koautorskih knjiga, preko četrdeset naučnih i stručnih radova. Za svoj naučni i društveni angažman je primio nagradu *Veselin Masleša* i *27-julsku* nagradu. Umrovljen je 2004. godine.

Profesora Karabegovića će se rado sjećati njegovi bivši studenti, magistranti i doktoranti, kao i radne kolege i prijatelji.

AMILA KASUMOVIĆ